

**PAS kesal amalan agama Buddha di surau
Malaysian Insider
Aug 14 , 2013**

PAS Negeri Johor merasa amat dukacita dengan insiden membabitkan penggunaan sebuah surau di sebuah Resort di Sedili Besar, Kota Tinggi, bagi aktiviti yang ada kaitan dengan kepercayaan agama lain.

Timbalan Pesuruhjaya PAS Johor, Mazlan Aliman dalam kenyataannya berkata, ia tidak seharusnya berlaku jika pihak pengurusan resort dan kumpulan agama tersebut peka dengan soal-soal berkaitan agama dan batas kebebasan seperti terkandung dalam Perlembagaan Persekutuan, apatah lagi Islam adalah agama rasmi.

Sambil mengalu-alukan siasatan yang dibuat oleh pihak polis dan pihak berkuasa agama; orang awam juga harus bertenang dan jangan menghangatkan suasana yang boleh menimbulkan ketegangan agama dan kaum.

"Selaku parti dan gerakan Islam yang dasar perjuangannya berteraskan AlQur'an dan Sunnah, PAS memang sentiasa prihatin dengan isu2 yang berkaitan aqidah dan permasalahan Ummah," kata Mazlan yang juga AJK PAS Pusat.

Beliau memberikan contoh, isu pemindahan tanah perkuburan Islam di Pengerang sebelum ini, "bukankah PAS bersama Ngo Pengerang yang bertindak proaktif apabila timbul berbagai kontroversi?"

Sehubungan itu, kata Mazlan, PAS dukacita dengan kenyataan Pengerusi Jawatankuasa Agama Negeri Johor, Ust Abd Mutalib Abd Rahim, seperti di siar dalam Sinar Harian Edisi Johor hari ini yang menuduh PAS membisu dalam isu-isu yang mengaib dan menghina agama Islam.

"Dakwaan tersebut bukan sahaja tidak benar, tetapi berprasangka buruk," kata Mazlan.

Walhal, katanya, Ust Mutalib sendiri punya maklumat mendalam mengenai PAS kerana hubungan yg baik beliau dengan pemimpin PAS Johor.

Berlatarbelakangkan Malaysia sebagai negara berbilang kaum dan agama, semua pihak diingatkan agar mengawal emosi dan tindak tanduk masing-masing.

Kebebasan beragama, katanya, bukan tiket untuk melakukan tindakan tertentu yg boleh mengguris perasaan pihak lain.

"Apapun, PAS percaya ia adalah kes terpencil yang timbul akibat salah faham dan mampu diselenggarakan oleh pihak Polis dan Pihak Berkuasa Agama. InshaAllah, keamanan dan keharmonian rakyat Malaysia akan dapat dipertahankan sampai bila-bila," jelas beliau. – 13 Ogos 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pas-kesal-amalan-agama-budha-di-surau>

